

Gvangjsih Swhfan Yozyen Gawjbanh Gaiq Daih'it Singsang Doeg Byauhacunj Vahcuengh Doxdax

广西师范学院举办首届标准壮语朗读比赛

9 nyied 22 hauh banringzgvaq, Gvangjsih Swhfan Yozyen gawjbanh gaiq daih'it singsang doeg byauhacunj Vahcuengh doxdax, aen hagdangz neix cuhdwngj gyauyuz yozyen 2014 gaep ban Cuengh Gun sueng vah 40 boux doengzhag camgya doxdax.

Hagseng 2014 gaep ban Cuengh Gun sueng vah camgya baez doxdax neix dwg gaiq daih'it dinghyiengq guh siujyoz Cuengh Gun sueng vah lauxsae gungganq mbouj aeu cienz, baez doxdax neix muzdiz dwg niemhdingh Sawcuengh Vahcuengh hagsib cingzciik gaiq daih'it hagseng ban Cuengh Gun sueng vah, doengzseiz daezsang hagseng suijsingz singsang doeg, lienndaengz daezsang hagseng yungh Sawcuengh Vahcuengh naengzlig.

Doxdax yienhciengz, gyoengq hagseng camgya doxdax haenx daenj buhvaq Bouxcuengh saek rongh yiengh lai, gagsaenq simdingh, youq gwnz daiz singsang doeg byauhacunj Vahcuengh, ginggvaq doxdax, bingzok it daengj ciengj 5 boux, ngeih daengj ciengj 10 boux, sam daengj ciengj 25 boux, bingzveij lij fat ciengj hawj gyoengq hagseng ndaej ciengj haenx.

Doxdax sat le, youq gyoengq hagseng iucingj baihlaj, Sam Nyied Sam Cazcise cungjbenh Cinz Siengzcouh boux cingj bae guh bingzveij neix vih baez doxdax neix eu fwen, gujli gyoengq hagseng gaenxgoemx camgya doxdax haenx. Gij goswz cingzeiq naekna doq bien doq eu haenx ndaej daengz yienhciengz bouxyawj haenx ndei.

(Liengz Cingz/梁晴)



▲ Dah sau neix gangj ndaej caen ndei.



▲ Geij boux hagseng ndaej it daengj ciengj hwnj daiz lingx ciengj.



▲ Ingj aeu doiq haiz gyaundeix neix.

Cenzcouh Mbanjyauz Laeb-guh Minzsuz Bozvuzgvanj

全州瑶乡建起民俗博物馆

Cenzcouh Yen Dunghsanh Yauzcuz Yangh gaenxgoemx vatcimh, cingjleix caeuq baujhoh conzdungj minzsuz vwnzva dangdieg, aen minzsuz bozvuzgvanj aeu yienh'ok ciuh-gyawj gijdaenj Yauzcuz, lajmbanj hongdawz guhhong, hongdawz saedceij guh cawjdaez yiengq vunzlai haicuengq haenx youq geij ngoenz gonq guh sat. Bozvuzgvanj faen baenz sam aen canjgih, yienh'ok gijdaenj Yauzcuz, aendozfaiq, aenloekrumz daengj gak cungj hongdawz caeuq gijyungh saedceij bak lai gienh dajndaem seizgeiz gig miz daegsaek vwnzva Yauzcuz haenx, yinx ndaej haujlai vunzmbanj caeuq hekyouz daeuj gamjsouh vwnzva dajndaem Yauzcuz, daejniemh minzsuz funghcingz.

(Vangz Swh/王滋)

Cunghvaz Biengzhoengh Duzlungz Foux Yungzanh Seizcou Ruzlungz Doxdax

盛世中华祥龙舞 金秋融安赛龙舟

9 nyied 21 hauh, daihseiq gaiq Liujcouh Si ruzlungz doxdax nem Yungzanh Yen daihcibcaet gaiq ruzlungz doxdax youq Yungzanh gawjbanh, ciengzdieg doxdax dwg youq gwnz raemx gvangqlangh baihbak Giuzcangzanh yienhsingz. 65 aen ruzlungzdui daj Yungzanh, Yungzsuij, Liujcwnz daengj dieg daeuj haenx caez comz Dahyungzgyangh haiguh doxdax. Youq seiz doxdax gaxgonq caeuq seiz doxdax yietnaiq, gwnz raemx miz vunz mbin biujyienj, mozdoddingj biujyienj daengj, hawj 5 fanh lai bouxyawj yawj dwk da cungj mbouj yaep.

Youq seiz gaihmusi, Yungzanh Yen vwnzyidui biujyienj fouxlungz, caijdiu, gyeong daengj vwnzyi cezmu, vih ruzlungz doxdax cauh'ok gij heiqfaenh angqhoh, angqyangz he.

Ciuq cam rox, Yungzanh vwnzva ruzlungz daengz seizneix gaenq miz bak lai bi lizsij, daj bi 1978 haindu, Yungzanh Yen youq Cangzanh Gujcin gawjbanh gaiq daih'it ruzlungz doxdax, daengz seizneix gaenq gawjbanh baenz 17 gaiq ruzlungz doxdax lo.

(Veiz CujSwz/韦祖祠 Vangz Bingjgvanh/黄柄官 Houz Houminz/侯厚民)



▲ Daihgya caez ok rengz.

Lungzswng: Bet Nyied Cibngux Bae Camnai Cingz Raeuj Lwngyez Diegbya

龙胜:爱心中秋慰问 情暖山区儿童



▲ Yawjraen saw moq sim angqyangz.

9 nyied 24 hauh, boux simndei Gveilinz Dengi Gohyoz Yenzgiuyen caeuq Cigungh-dangj Gveilinz Siveij daeuj daengz Lungzswng Gak Cuz Swciyen Lozgyangh Yangh Sihyauh Cunh Yinzgyauz Siujyoz camnai lwngyez diegbya louz youq ndaw mbanj haenx, soengq yiedbingj, saw, bitmaeg daengj doxgaiq hawj gyoengq lwngyez, gyaqcienz daihgaiq miz 2 fanh maenz ngaenz, vanzlij caeuq gyoengq lwngyez guh'angq, dingq dangz goq simndei he, daezgonq caeuq gyoengq lwngyez angq gvaq bet nyied cibngux.

(Gyaj Libingz/贾丽平 Vuz Swnghbinh/吴生斌)